



# Monateng 20 – 22 Februarie 2009

## Verslag deur Klaus Lübbert

Hierdie naweek is gesamentlik gereël deur Wapadrand en Rietvallei sodat ou vriende weer bymekaar kon kom, kon sien hoeveel plooie ons bygekry het en te besin oor al die skete en pyne. Maar die naweek was so besig dat ons nie veel tyd gehad het om oor die negatiewe uit te wy nie.

Vroeg Vrydagoggend het Sawanante al aangekom, party net om hul woonwaens te bring en ander om te rus. Dis hulle wat kan organiseer en lekker rus. Ons ander "loose" behoorlik uit.

Vrydagoggend was vir die Rietvalleiers iets anders. Ons is mos gewoond om kamp op te slaan en dan rustig te raak met die wete dat die kampkommandante sal sorg vir die spyse. Hierdie keer moes ons ons eie vleis braai, maar kry toe pap en sous verniet. Dit het nogal vorentoe gesmaak. Daar is nog lank na boekvat en registrasie om die vure gekuier voordat Klaas Vakie ons verlos het van die lawaa van kuiery.



Saterdag was bedoel vir laat slaap. Niemand was lus om vroeg op te staan nie, maar die heerlike

oggend het ons na buite gelok. Vir 'n bietjie afwisseling het Wapadrand ons lekker laat ontspan met waterkaskenades en toutrek. Dit was groot pret. 'n Pluimpie vir Francois Swart, wat die speletjies georganiseer het.

Die Super 14 rugby was ook duidelik sigbaar en hoorbaar, want baie kampeerders bring deesdae hul televisies saam sodat hulle darem op hoogte kan bly van die rugbytellings en die sepies.

Na boekvat het Willem ons meer ingelig oor die kaskarwedren wat by die Presidente saamtrek gaan plaasvind. Dit is duidelik dat daar hoë verwagtinge aan die kaskarwedren gestel word.


So aan die begin van Rietvallei se 3e bestaansjaar het die besture van Wapadrand (Rietvallei se moederstreek) en Rietvallei besluit dat dit lekker sal wees om weer saam te Monateng staan uit as die kamp waar ons in 2008 enkeldiepte in die water gestaan het. Hierdie naweek het die weer darem net vir ons gegrom. Vrydagoggend het ons weer ou vriendskapsbande hernu en heerlik saamgekuier om 'n braaivuur.

Wapadrand het gesorg vir die waterkaskenades en verskeie ander aktiwiteite Saterdagoggend en jonk en 'oud' het dit terdeë geniet. Hoewel die Rietvalleiers nie so aktief deelgeneem het nie het ons toeskouer ondersteuning gebied en self ook so 'n bietjie afgekoel in die swembad.

Monateng se groot koeltebome het gesorg dat groepes lekker saam gekuier het deur die dag en so tussendeur is die opsie van 'phone a friend' gebruik om die Noot-vir-Noot-vorms te voltooi. Na die rugby het Willem 'n aanbieding gehad oor die KaskarFees wat tydens die Presidentesaamtrek gehou gaan word. Die weer het begin dreig en party was braaf genoeg – wat later getoon het wysheid was – om vure aan te steek, maar die res het maar die gasbraaiers uitgehaal vir die wis en die onwis. Dit het nogtans niemand gekeer om 'n tjoppie gaar te kry nie en daar is weereens tot laat saamgekuier.

Sondag het natuurlik weer te gou aangebreek en na die diens en saamgekuier met 'n bordjie eetgoed het die kamp stadigaan begin leegloop. (Diana Fourie)





Speletjies by die swembad (bo en regs)



'n Paar dreigende wolke (bo) Saterdagmiddag kon nie die gees demper nie en het ook gesorg vir 'n pragtige sonsondergang. (onder)

Na die inligtingsessie het die vure al hoog gebrand ter voorbereiding van die buurmanbraai. Selfs die donderweer en blitse het ons nie weerhou van 'n vleisie oor die kole nie, maar dit was 'n "so-verby-reën" en het die Wapadranders en Rietvalleiers tot laat gekuier.

Sondagoggend het Jacques ons weer op sy besondere manier verryk met 'n boodskap uit die Woord oor hoe ons behoort te lewe. Ek is seker dit het elkeen van ons weer 'n bietjie laat nadink. Tydens die afsluiting het ons die gebruiklike koek en tee geniet. Die versnaperinge was voorwaar 'n treffer – soos net ons Rietvalleiers kan!

'n Paar bittereinders het die naweek tot die uiterste gerek, weer 'n vuurtjie aangesteek en die laaste braaipakkies uit die yskas gehaal om te braai en nog gekuier.

'n Hele paar het met rooi lywe en gesigte rondgeloop. (Die rooi gesigte was nie van skaamte nie, hoor). Ja, dit was 'n heerlike warrmmm naweek.

'n Besige vink-mamma het gesorg vir groot belangstelling as sy haar kuikentjies gevoer het (regs).

Fotos: Marietjie Klaasen

